

Islam Menurut Ensiklopedia Komunis Russia

Makalah ini diterjemahkan oleh majalah (*(Daulah Islamiyah)*) Jakarta dari Ensiklopedia Komunis Rusia yang bernama (*(Bolshaya Sovetskaya Entsiklopediya)*) (Ensiklopedia Lengkap Soviet) 1953 jilid 18, muka 516 – 519.

Dalam kata-kata pengenalannya majalah (*(Daulah Islamiyah)*) Jakarta berkata:

Permusuhan dan kebencian kaum komunis terhadap Islam sebagaimana juga terhadap agama lain, mereka kemukakan dalam berbagai bentuk dan cara.

Serangan dan penghancuran yang mereka lakukan, pun menempuh berbagai jalan. Disamping memburu dan menganiaya pengajur dan alim ulama, memusnahkan dan tempat-tempat ibadah, juga melalui apa yang mereka namakan “penyelidikan ilmiah” yang dikerjakan oleh “sarjana-sarjana” komunis.

Karangan yang berikut ialah sejenis “penyelidikan ilmiah”, mereka dalam mencemarkan kemurnian dan kesucian ajaran dan sejarah Islam.

“Kebencian telah lahir dari mulut mereka, dan lebih besar lagi apa yang terkandung di dalam dada mereka.” Demikian maksud al-Qur’ān al-Karīm memberi pengertian kepada umat Islam.

Demikian kata majalah (*Daulah Islamiyah*) dan di bawah ini ialah tulisan Ensiklopedia Komunis terhadap Islam dan umat Islam. – P Q.

Ensiklopedia Komunis itu berkata:

“Islam (bahasa Arabnya – menyerah diri) atau ajaran Muhammad, suatu agama yang timbul pada permulaan kurun yang ketujuh di negeri Arab, yang kemudian tersiar sebagai hasil dari penaklukan orang Arab di Timur Dekat, Asia Tengah, Afrika Utara, dan Eropah Barat Daya.

Pada masa ini Islam tersiar dengan luas di negara-negara Timur Dekat, dan Timur Tengah, Afrika Utara, Asia Tenggara dan sebahagian di negara-negara Timur Dekat (di Afrika Timur, Barat dan Selatan dan di negeri China, Asia Tengah dan lain-lainnya terutama dalam negeri yang sedang dijajah oleh Rusia komunis, tidak disebut –P.Q.)

Agama Islam sebagaimana agama-agama yang lain, selalu

memainkan peranan yang reaksioner, yang dilakukan oleh kelas pemeras sebagai suatu senjata untuk menindas secara rohani kaum-kaum yang membanting tulang dan dilakukan oleh penjajah asing untuk memperhamba bangsa-bangsa timur.

Asal Usul Agama Islam

Pendirian agama Islam telah ditimbulkan oleh susunan masyarakat Arab. Dalam kurun yang keenam, satu proses perubahan dari system masyarakat primitif berlangsung di negeri Arab, yang penduduknya terdiri dari kaum pemelihara ternak yang mengembara, (orang-orang Badwi), petani-petani yang menetap, ahli-ahli perniagaan dan ahli-ahli

pertukangan. Pertentangan-pertentangan ekonomi dan sosial, yang menjadi sifat perubahan dari hubungan-hubungan masyarakat yang primitif, mencapai perkembangannya yang terbesar di bandar Makkah (dalam negeri Hijaz Barat Semenanjung Arab), yang penduduk asalnya terdiri dari suku-suku kaum Quraisy. Ketiadaan persamaan dalam harta milik dikalangan penduduk Makkah, menyebabkan bertambah kuatnya kekuasaan dan pengaruh dari golongan bangsawan tempatan. Mereka menjalankan perniagaan dengan kabilah yang besar (terutama perniagaan hamba abdi) dengan negara-negara jiran tetangga, dan membiarkan penduduk Makkah dan suku-suku kaum Badwi yang berdekatan dalam keadaan tenggelam di dalam hutang yang berpanjangan dan tidak bebas. Mereka mempunyai hamba abdi, binatang-binatang ternak dan tanah. Di samping itu, mereka juga memegang jawatan sebagai ketua agama di Ka'bah, tempat ibadah di Makkah. Suku-suku Arab di Selatan Semenanjung Arab yang ekonominya bergantung kepada penduduk Makkah, tiap-tiap tahun naik haji ke Makkah, dan selama mengerjakan haji, mereka pun menjalankan perniagaan dengan penduduk Makkah. Ada perbezaan pendapat di kalangan penyelidik-penyelidik Soviet mengenai soal-soal sifat hubungan-hubungan hasil-hasil pengeluaran di Barat Semenanjung Arab. Beberapa penyelidik berpendapat, bahawa dalam kurun yang keenam di Makkah, Madinah dan daerah-daerah yang lain, suatu sistem mempunyai hamba abdi sedang mengalami proses pembentukan dalam masyarakat primitif yang sedang mengalami perubahan itu. Yang lain-lain mengatakan bahawa proses pembentukan suatu masyarakat yang bercorak feudal telah berlangsung di sana pada masa itu.

Berhubung dengan pembentukan suatu masyarakat yang berkelas di Tanah Arab, suatu krisis ekonomi dan sosial sedang tumbuh dikalangan suku-suku bangsa, yang akibatnya ialah perkembangan agama Islam, yang membenarkan

ketiadaan persamaan dalam sosial dan ekonomi dan sistem pemerasan yang sedang ditegakkan itu. Faham kebangsawanannya itu berusaha untuk memecahkan krisis yang tersebut dengan jalan penaklukan daerah-daerah yang baru, tetapi untuk maksud ini, adalah perlu menyatu-padukan semua suku-suku bangsa Arab.

Islam, dengan dasar tawhidnya yang tegas, mencerminkan keinginan besar tentang persatuan. Proses pembentukan suatu ideologi yang baharu dalam bentuk Islam dipercepat oleh mundurnya kedudukan perdagangan di Makkah disebabkan adanya kerajaan-kerajaan Habsyah dan Parsi menjajah wilayah-wilayah di Selatan Semenanjung Arab.

Menurut Karl Marx, kemanduran itu memberikan semangat untuk menegakkan Islam. (Lihat karangan *Marx dan Engels*, fasal 21, muka 488). Akibat dari kemunduran perniagaan di Makkah, maka tekanan dari ahli-ahli perniagaan di Makkah dan lintah darat terhadap suku-suku kaum Badwi bertambah-tambah.

Fahaman suku-suku kaum Arab yang primitif dan bersifat keagamaan, mahupun kenasranian, Yahudi dan ajaran-ajaran Zarosaster¹ besar pengaruhnya terhadap pendirian agama Islam. Peninggalan-peninggalan yang besar dari Islam yang mula-mula ialah al-Qur'an, yang tercantum di dalamnya dasar dari dogma-dogma, kebudayaan dan undang-undang Islam yang mula-mula dengan sederhana dibahagi dalam masa Makkah, dan masa Madinah, sesuai dengan pembahagian yang sama dari juzuk-juzuk (bahagian-bahagian) al-Qur'an.

Dalam masa Makkah, Allah (Tuhan orang Islam) meramalkan akan datangnya hari kiamat yang cepat, "hukuman-hukuman yang menggerikan" dan mengancam orang-orang yang munafiq yang tidak mengakuinya sebagai Raja Yang Maha Kuasa dengan seksaan-seksaan neraka. Orang yang menyerahkan diri kepadanya

¹ Zarosaster- Zoroaster

dan orang-orang yang sabar dijanjikan oleh Allah setelah matinya kesenangan-kesenangan di syurga. Dalam masa Makkah, perhambaan, dan ketiadaan persamaan dalam harta benda dikemukakan sebagai satu gejala yang diciptakan olehnya sendiri – oleh kerana itu tak dapat ubah-ubah.

Pandangan yang dikemukakan oleh beberapa pembela Islam tentang “komunisme” Islam mula-mula, dan bahawa Muhammad, yang dianggap sebagai pembina Islam, pada hakikatnya, seorang revolusioner dan pembaharu masyarakat yang besar, hanya dimaksudkan untuk menutupi kebenaran pokok-pokok agama Islam. Al-Qur'an, yang dengan teguh dan tetap mempertahankan dan membenarkan perhambaan (menganggap bahawa perhambaan diciptakan oleh Allah), pemerasan, kemiskinan, dan ketiadaan persamaan orang-orang dalam masyarakat, menjadi bantahan yang terbaik dari pemalsuan-pemalsuan yang semacam itu.

Di Makkah, Islam tersiar dengan sangat terbatas. Kaum bangsawan Quraisy yang memusuhi agama yang baru itu, merasa, bahawa kemenangannya akan mengakibatkan hapusnya kebudayaan Ka'abah, yang dengannya perniagaan penduduk Makkah dihubungkan dengan suku-suku bangsa Arab. Menurut cerita tua yang turun temurun, dalam tahun 622 Muhammad dan beberapa pengikutnya berpindah (hijrah) ke Madinah. Di daerah-daerah pertanian ini, Islam dengan cepat diterima di kalangan kedua suku-suku bangsa. Suku bangsa yang ketiga yang dinamakan suku-suku bangsa Yahudi (mungkin orang-orang Arab yang beragama Yahudi) diusir dari Madinah dan sebahagian lagi dimusnahkan. Tanah-tanah dan tempat tinggal mereka dimiliki oleh orang-orang Islam. Kaum Islam Madinah yang dikepalai oleh Muhammad, memerangi penduduk Makkah. Perjuangan ini berakhir dengan suatu cara tolak ansur dalam tahun 630. Suatu persetujuan diadakan.

Menurut persetujuan itu, penduduk Makkah menerima agama Islam dan menduduki tempat-tempat yang penting dalam masyarakat Muslimin, dan pengikut Muhammad mengakui Makkah sebagai sebuah bandar yang suci, dan Ka'bah satu tempat suci, yang ditentukan menjadi tempat menjalankan ibadah haji. Bahkan mereka tetap memelihara penyembahan berhala purbakala “penyembahan batu hitam” – yang terletak di Ka'bah. Masyarakat Islam terbentuk seluruhnya dalam zaman Madinah dan menjadi teras dari negara Arab, dalam proses pembentukannya. Masyarakat ini, yang menyatukan penduduk menurut perpaduan mereka di dalam agama yang baru itu. Jauh bezanya dengan pertubuhan-pertubuhan yang ada pada zaman dahulu, yang di dalamnya penduduk bersatu, terutama disebabkan hubungan keturunan. Zaman Madinah mengatur harta kekayaan dan hubungan masyarakat dengan aturan-aturan suatu masyarakat yang sudah dalam proses pembentukannya. Dalam masa-masa yang tersebut banyak perhatian diberikan kepada hak milik perseorangan dan cara mempertahankan hak si pemilik. F. Engels menulis: “Islam ialah satu agama yang disesuaikan dengan bangsa-bangsa timur, terutama dengan bangsa Arab, iaitu pada satu pihak dengan penduduk-penduduk bandar yang menjalankan perniagaan dan pertukangan, dan pada satu pihak yang lain dengan suku-suku kaum Badwi yang hidup mengembara.” (*Marx dan Engels*, buku, jilid 16, bahagian 2, muka 410). Al-Qur'an mengajarkan bahawa tiap-tiap orang Islam wajib percaya kepada Tuhan – Allah dan mengakui Muhammad sebagai “Rasulullah”. Al-Qur'an juga menyatakan manusia itu sebagai hamba Allah, dengan ketiadaan kemahuan. Yang wajib bertawakal dan sabar dan menyerahkan diri kepada Allah, rasul-Nya dan kepada semua yang memegang kekuasaan, ibadat-ibadat (upacara agama) yang pelaksanaannya menjadi

kewajipan bagi orang-orang islam, mempunyai maksud yang asal untuk memasukkan dalam hati orang-orang yang taat suatu perasaan tak berdaya dihadapan Tuhan dan bergantung kepadanya. Menurut al-Qur'an, tiap-tiap orang Islam, wajib bersembahyang, melakukan ibadat puasa selama sebulan, dalam bulan Islam yang kesembilan – Ramaḍān, menunaikan fardu haji ke Makkah, membayar cukai – zakat – yang dipungut dari hasil tanaman, ternak dan keuntungan perniagaan. Dengan berbagai jalan, al-Qur'an membenarkan dan menganjurkan jihad – iaitu “peperangan suci” melawan “orang-orang munafiq” – orang-orang yang bukan Islam – yang maksudnya ialah untuk menyiaran Islam.

Islam dan Zaman Feudal

Dalam kurun yang ketujuh dan kedelapan, bangsa Arab menakluk akan negeri-negeri Palestin, Syria, Iraq, Parsi, Kaukasia, (al-Qawqās), Asia Tengah, Mesir, Afrika Utara, Semenanjung Sepanyol, dan India utara. Di bawah panji-panji “peperangan suci”, penakluk-penakluk dari bangsa Arab itu memaksakan agama Islam kepada bangsa-bangsa yang dijadikan hamba di beberapa negara yang ditaklukkan dengan api dan pedang. Satu negara yang luas dibentuklah di negara-negara yang ditaklukkan itu – pemerintahan khalifah, di mana Islam menjadi agama yang berkuasa. Di negara ini, tiap-tiap orang yang tidak masuk agama Islam diwajibkan masing-masing membayar cukai yang tinggi (jizyah). Dalam pemerintahan khalifah, penakluk-penakluk bangsa Arab menjadi pendokong yang kuat dari bangsa-bangsa yang ditaklukkan, yang hidup dalam suasana secara feudal. Jadi, Islam dalam pemerintahan khalifah yang feudal, mulai berubah menjadi satu “agama dunia”.

“Perubahan-perubahan sejarah yang besar”, kata Engels, “ialah disertai perubahan dalam agama, hanya kalau kita memperkatakan tiga agama dunia zaman ini; agama Buddha, agama kristian, dan agama Islam”. (F. Engels, Ludwig Feuerbach *Dan Akhir Dari Falsafah Klasik Jerman*, 1951, muka 27). Dalam pemerintahan khalifah, dalam keadaan berkembangnya hubungan feudal, Islam dan bentuknya yang asli, sebagaimana dinyatakan di dalam Qur'an, sudah tidak memenuhi kepentingan sosial - politik dari golongan-golongan yang memerintah. Oleh kerana itu, untuk memperlengkap al-Qur'an, timbullah “cerita-cerita kuno yang suci” orang Islam – ialah al-Sunnah – yang terdiri atas banyak hadis-hadis, iaitu cerita-cerita yang berisi tindakan-tindakan dan keputusan-keputusan yang katanya dibuat oleh Muhammad. Al-sunnah sama dengan al-Qur'an, yang membenarkan sistem kelas dan pemerasan, menguatkan semua yang baharu yang timbul dalam dogma, kebudayaan dan upacara agama dalam Islam sebagai hasil perkembangannya dan keadaan masyarakat feudal yang mula-mula, termasuk semua hal yang diterima oleh orang-orang Islam dari kepercayaan-kepercayaan agama, undang-undang dan adat-adat istiadat dari bangsa-bangsa yang ditaklukkan. Demikian juga syariah, satu peraturan hukum Islam feudal, yang dengan perintah-perintah yang sangat teliti mengatur semua segi-segi dari kehidupan seorang Islam, telah diperkembangkan atas dasar al-Qur'an dan al-Sunnah. Dalam satu setengah kurun timbulnya agama Islam, alim ulama Islam, mensifatkan al-Qur'an dan al-Sunnah sebagai satu sumber kepercayaan dan petunjuk. Dogma yang tak dapat dibuat itu mengajarkan tentang takdir, iaitu semua perbuatan seseorang telah ditetapkan lebih dahulu oleh Allah.

Perjuangan-perjuangan dari aliran dan mazhab-mazhab yang berbeza-beza

ialah anasir-anasir sejarah Islam. Semenjak kurun pertama timbulnya, agama Islam terbahagi dalam dua mazhab yang besar: Ahli al-sunnah dan shī‘ah. Berdirinya dua puak ini dengan melalui perjuangan yang sengit untuk merebut kekuasaan dan pengaruh dikalangan pengikut-pengikut Muhammad. Al-sunnah ialah bahagian Islam yang pokok dan ortodoks. Pengikut-pengikutnya menegakkan ajaran-ajaran mereka atas dasar Qur’ān dan sunnah, dan mengakui khalifah sebagai ketua rohani mereka, yang pada mulanya dianggap sebagai wakil Muhammad dan kemudian sebagai wakil Allah di dunia. Mazhab Shī‘ah pula terutama berkembang di negeri Parsi. kaum Shī‘ah menjadikan Qur’ān satu pentafsiran yang khas, mempunyai cerita-cerita kuno mereka sendiri, yang menggantikan sunnah, tidak mengakui sunnah khalifah, tetapi menegakkan pemerintahan mereka sendiri, yang terdiri daripada dua belas imam, yang dianggap mereka sebagai keturunan Muhammad. Keturunan yang akhir daripada imam-imam ini ialah “imam yang tersembunyi” yang disifatkan sebagai ketua yang tak dapat dilihat, yang tertunggu-tunggu kedatangannya untuk kali yang kedua.

Dalam ajaran ahli al-sunnah dan juga kaum shī‘ah, telah muncul pula bermacam-macam puak yang berbeza, yang merupakan pembangkang yang lemah dari khalayak yang membanting tulang terhadap penindasan golongan dan pemerasan feudal, dan kadang-kadang menyebabkan perjuangan dari golongan-golongan yang berlainan dari kelas-kelas yang memerintah.

Dalam permulaan kurun yang kesembilan, disebabkan bertambah mendalamnya pertentangan-pertentangan dalam pemerintahan khalifah, cara yang lebih halus diperlukan untuk mempengaruhi khalayak yang membanting tulang, maka satu aliran baru timbul dalam Islam. Wakil-wakil mereka yang pertama ialah kaum Muktazilah. Permulaan dari ajaran agama Islam yang

ortodoks, ilmu al-kalam dimulai dari kurun yang kesembilan - kesepuluh. Al-‘Asy‘ari dipandang sebagai pembina ilmu al-kalam (‘ilmu al-tawhīd). Ahli agama ini dengan murid-muridnya berjuang untuk mendamaikan ajaran takdir dan kemahuan yang bebas, berusaha untuk memasukkan dalam hati mereka yang beragama bahawa semua perbuatan yang beragama, bahawa semua perbuatan seseorang itu sudah ditetapkan terlebih dahulu oleh Allah tetapi bahawa orang mempunyai kesanggupan untuk menentukan perbuatan-perbuatanya itu, dan oleh kerana itu, ia bertanggungjawab atas perbuatannya itu dihadapan Allah.

Dalam kurun kesepuluh dan kesebelas, proses perkembangan Islam yang selanjutnya, penyembahan “wali-wali” keramat yang didirikan dan mendapat pengakuan sedunia. Bertambah kuatnya pemerasan feudal selama masa itu, iaitu penindasan kaum-kaum pemberontak anti feudal, peperangan antara feudal yang bebannya ditanggungkan kepada khalayak ramai, menciptakan keadaan-keadaan yang menguntungkan untuk menyiaran ajaran tasawwuf. Ahli-ahli sufi dalam kurun yang kesebelas mulai bersatu dalam satu persaudaraan, yang kemudian merupakan aturan-aturan sufi. Pada mulanya ajaran sufi (tasawwuf) berlawanan dengan ajaran Islam ortodoks. Alim ulama menuduh kaum sufi sebagai orang yang ingkar, dan pihak berkuasa memburu mereka. Oleh kerana itu, ajaran-ajaran sufi mendapat kemasyhuran dan besar dikalangan rakyat, dan kaum sufi mendapat kehormatan dan kekuasaan. Tetapi ajaran sufi menentang meninggalkan hal-hal keduniaan, tariqat dan tidak melawan, dengan mudah dapat dipakai sebagai alat untuk melemaskan perjuangan kelas. Oleh kerana itu, ahli-ahli agama Islam, dari kurun pertengahan, al-Ghazali (wafat dalam tahun 1111), supanya namanya

baik, mengesahkan dasar-dasar tasawwuf dan memasukkannya ke dalam kaedah Islam “ortodoks”.

Dengan bertambah kuatnya kerajaan Uthmaniyyah Turki, yang di dalamnya tergabung Negara-negara Arab dalam kurun yang keenam belas, kedudukan yang berkuasa dalam kalangan umat Islam berpindah tangan bangsa Arab ke tangan bangsa Turki. Sultan-sultan Turki yang kemudiannya bergelar khalifah dan juga Shah Parsi, menggunakan Islam untuk membenarkan politik kejam mereka dan menghalalkan pemerasan terhadap bangsa-bangsa yang tertindas. Dengan kebuasan yang hebat bangsa Parsi dan Turki menggunakan Islam dalam perperangan-perperangan mereka melawan bangsa-bangsa Kaukasia melawan bangsa Slavia, melawan Rusia. Penaklukan Kaukasia, Georgia dan Armenia, kemusnahan secara besar-besaran akan tugu-tugu bersejarah dan perbendaharaan kebudayaan, kemusnahan dan perhambaan akan beribu-ribu perempuan, orang-orang tua dan kanak-kanak, semua kekejaman ini diselimuti oleh penyerang-penyerang Turki dan Parsi dengan bendera berjuang untuk agama.

Islam dan zaman kapitalisme

Akibat kemasukan ibu-ibu negeri Eropah ke dalam negara yang di dalamnya Islam tersebar dengan luas, perhambaan kaum penjajah dari negeri-negeri ini dan permulaan dari hubungan-hubungan kapitalis di sana, pelbagai aliran dan haluan Islam muncullah, yang pengikut-pengikutnya memperjuangkan untuk menyesuaikan Islam pada kaedah-kaedah sosial dan ekonomi yang baharu supaya dapat memeliharanya sebagai senjata untuk menindas golongan-golongan kaum borjuis, tuan-tuan tanah dan kaum cerdik pandai ialah yang mendirikan kaum pejuang dari aliran-aliran ini.

Perjuangan rakyat di negara-negara timur melawan penjajah-penjajah Eropah yang dijalankan di bawah semboyan Islam dan

ikut sertanya kaum-kaum feudal dalam pimpinan dan alim ulama Islam, berakhir dengan kekalahan dari rakyat banyak, dengan kemenangan golongan-golongan atasan dari feudal –alim ulama dan dengan tercapainya persetujuan dengan kaum penjajah.

Islam digunakan oleh kaum penjajah asing, terutama oleh Inggeris, untuk memperbanyak bangsa-bangsa di timur dan bagi perjuangan melawan gerakan kemerdekaan kebangsaan bangsa-bangsa ini. Penjajah-penjajah Inggeris menggunakan Islam bukan sahaja untuk mengatur perang-perang saudara secara besar dikalangan bangsa-bangsa yang dijahanya dan tertindas, tetapi juga bagi perjuangan melawan saingen-saingen mereka, terutama terhadap Rusia. Lebih-lebih lagi Inggeris bersama-sama dengan Sultan Turki – dalam kurun yang ke-19 yang telah menyerang dan membakar jajahan-jajahan Rusia.

Islam raya

Ajaran agama yang rasional dan ajaran ekonomi, yang mengajarkan persatuan dari semua bangsa yang percaya akan Islam bagi perjuangan melawan “serangan orang-orang barat – Kristian”, tersiar di negara-negara timur semenjak pertengahan kurun yang ke-19.

Islam raya atau (Pan Islam) menurut istilah Lenin, mencuba “menyatukan gerakan kemerdekaan melawan imperialism Eropah dan Amerika, dengan memperkuat Khan, tuan-tuan tanah, mullah-mullah dan lain-lain”. (Karangan cetakan keempat, fasal 31, muka 127)

Tujuan utama “Islam raya ini ialah untuk mengganti persatuan agama bagi pertentangan-pertentangan kelas dan terpeliharanya hubungan-hubungan feudal.

Islam zaman ini

Setelah kemenangan pemberontakan sosialis dalam bulan Oktober (1917) di Rusia, dalam masa pencerobohan

tentera asing dan perang saudara, Islam digunakan lawan kaum Ribolishinir dalam negeri dan imperialis asing bagi perjuangan melawan negara Soviet. Umpamanya dalam tahun 1919 di Kaukasia Utara, dengan anjuran imperialis Inggeris, amir-amir diciptakanlah, yang kepala oleh seorang Shaykh yang mengisyiharkan kehendaknya untuk memerintah negeri itu menurut aturan syari‘at.

Di Turkistan, alim ulama yang menjadi alat imperialis asing, menghendaki, bahawa negara itu diperintah menurut syari‘at Islam dan dengan pura-pura untuk mempertahankan Islam dan hukum syarak, mereka mengaturkan suatu serangan terhadap pemerintahan Rusia.

Dalam masa pembangunan sosialis di Soviet, Rusia, sisa-sisa dari kelas yang memeras, berusaha untuk menggunakan Islam dalam perjuangan melawan sosialisme. Alim ulama sebagai alat golongan-golongan ini, melakukan perjuangan melawan undang-undang Soviet mengenai keluarga dan perkahwinan, menentang kebebasan perempuan supaya mereka kekal memelihara “ishmek” (tudung kepala dua lapis) dan melakukan tindakan-tindakan mengacau. Al-Qur'an dan hukum-hukum syarak lebih-lebih dijalankan dengan cergas di Soviet Rusia, di wilayah-wilayah yang banyak penduduknya daripada orang-orang Islam, dalam perjuangan melawan gerakan perusahaan dan pergabungan.

Segala agama dihancurkan oleh komunis

Di Soviet Rusia, desebabkan kemenangan sosialisme dan hapusnya golongan-golongan yang memeras, dan hapusnya akar-akar sosial Islam sebagaimana akar-akar segala agama dihancurkan.

Di Soviet Rusia, Islam hidup, hanya sebagai satu sisa dari bentuk-bentuk ideologi dari masyarakat pemeras.

Di Soviet Rusia kaum Muslimin (sama dengan pengikut agama-agama yang lain) diberikan kebebasan untuk mengikuti kebudayaan agama dan upacara-upacara agama mereka.

Di negara-negara timur, di luar sempadan Soviet Rusia (di Turki, negara-negara Arab, Iran, Afghanistan, Pakistan, Tanah Melayu dan Indonesia), di sana, Islam ialah agama negara, ia akan tetap merupakan satu dari senjata-senjata yang berada dalam tangan kaum reaksionari tempatan dan imperialisme asing. Kaum imperialis Inggeris – Amerika menggunakan Islam untuk maksud memerangi gerakan-gerakan revolucioner dan kemerdekaan kebangsaan serta gerakan pejuang-pejuang perdamaian antara negara-negara, yang di dalamnya Islam tersiar dengan luas (seperti memperbesar permusuhan antara orang Hindu - Muslim di India, rancangan-rancangan Inggeris – Amerika untuk membentuk (Islamistan), iaitu satu blok atau gabungan dari negara-negara, yang sebahagian besar penduduknya memeluk agama Islam).

Bacalah riwayat hidup Saiyidina

Umar bin al-Khattab

(Oleh: Abdullah Basmeh)

4 penggal tamat. Harga sepenggal \$1.20

Belanja mengirimnya 10 sen.

Pesanlah kepada penerbitnya:

Qalam, Singapura.